


ALAHADY PAKA VI - TAONA D2025



**« Aoka tsy hitebiteby na hatahotra ny fonareo »
(Jo. 14 : 27) »**

Ry Kristianina havana, Alahady faha-6 amin'ny Paka izao ka tsy mahagaga raha mampitodika antsika sahady amin'ny aorian'ny Paka izany hoe ny hivelomantsika ny Paka ka ireo vakiteny arosen'ny Eglizy amintsika nandritra izay Alahady dimy izay dia nentina nanampy antsika

Vakiteny I : Asa 15, 1-2. 22-29

Tononkira : Salamo 66

Vakiteny II : Apôk. 21, 10-14. 22-23

Evanjely : Jo. 14, 23-29

nandalina ny toe-panahin'i Kristy sy ny toe-piainan'i Kristy mpiandry ondry tsara, Kristy endriky ny famindram-po, Kristy velona eto amintsika, Kristy foto-boaloboka ka amin'izao dia ny vakiteny manampy antsika hiaina izany toe-panahy rehetra izany no aroso amintsika.

Tsy hoe hiady irery isika na hikombona fa nomen'i Jesoa ny Fanahiny masina izay niasa tao Aminy ka nampibaribary ny fiombonan'ny Trinite masina ka ho oloaraiky tokoa, ho Ray, Zanaka, Fanahy Masina. Raha te hiombona amin'i Kristy isika izany hoe Kristy mpiara-belona dia mitoetra ao amintsika ny Fanahiny ka afaka mitandrana ny teniny isika ka manatanteraka izay lazainy amintsika ho tahaka an'i Masina Maria nilaza tamin'ny arkanjely Gabriely *“Aoka ho tanteraka amiko araka ny teninao”* ka tanteraka tokoa satria Renin'Andriamanitra i Masina Maria. Izy nitondra an'i Jesoa amintsika. Raha mitandrana ny tenin'i Jesoa isika vao avy nanavao ny toky tamin'ny batemy tamin'ny Sabotsy Masina ka tonga olom-baovao sy zava-boahary vaovao dia nirahina hitory ny

finoana, ho Mpivahinin'ny Fanantenana, hamafy hafaliana, hamafy fanantenana, hamafy fiadanana, hamafy fihavanana sady kristianina no malagasy hanasitrana an'izao tontolo izao very fanahy mbola velona, hanorina ny Fianakaviam-ben'Andriamanitra Olo Araiky Fratelli Tutti

Tsy isika irery no hanatanteraka an'izany fa araky ny nampanantenain'i Jesoa *“raha misy tia ahy dia hitandrina ny teniko ka ho tian'ny Raiko ary hankeo aminy izahay ka honina ao aminy”*. Sanatria onenan'ny Fanahin'Andriamanitra tahaka ny tromba isika fa Fanahy mahatonga antsika ho olombaovao. Tsara tokoa manazava fohy satria misy olona mampifangaro. Ny fanahin'ny Tromba avy any ivelany fa ny Fanahin'Andriamanitra ao amintsika mamelona antsika ao anatintsika ao ary tsy mila antsoina fa manatona mandrakariva saingy ny fahotana no mandrakotra antsika ka tsy mahita ny asany...

Kristy mpiara-belona amin'olona isika ka omen'Andriamanitra ny Fanahy masina ka zary olom-baovao ao aminy, Kristy velona isika. *“Fa izay tsy tia ahy kosa tsy mba mitandrina ny teniko ary ny teny zay zaraina aminareo dia tsy ahy fa an'ny Raiko”*. Raha mitandrina ny tenin'i Jesoa isika ka manatanteraka azy izay tsy inona fa ny fifankatiavana *“Mifankatiava ianareo tahaka ny nitiavako anareo, ataovy izao ho fahatsiarovana aho”*, tsy inona fa ny fanompoana sy ny fahafoizana antoka ny fiombonana dia zary Kristy mpiara-belona amin'olona isika. Izay no maha-mpiandry ondry tsara azy, izay no maha fotoboaloboka an'i Kristy ka mampamokatra ny fiainantsika araky ny sitrak'Andriamanitra.

Ny voalazan'i Jesoa amin'ny Evanjely dia tsy mandeha ho azy, izay mahatonga azy milaza hoe *“maro ny zavatra tokony ampianarina anareo fa tsy ho zakanareo fa ho avy ny fanahy masina ilay fanahy ny Mpanafaka alahelo, dia ny Fanahy Masina, Izay hirahin'ny Ray amin'ny Anarako, no hampianatra anareo ny zavatra rehetra, sy hampahatsiaro anareo ny zavatra rehetra nolazaiko taminareo.* » Ny Fanahiny masina no irahiny, izay no miasa amin'izao fotoana izao raha avelantsika miasa izy. Indrisy fa ny olona matetika dia isika mandratra ny Fanahy masina, tsy connecté aminy isika ka tsy mahagaga raha manaonao foana ka zary manapotika, izany no atao hoe fahotana. Olombaovao isika ao amin'i Kristy ka sokafy ny fo amam-panahintsika hiasan'ny Fanahy masina ao am-pontsika ao, amin'izay hanana ny herin'ny Fanahy masina isika dia ilay Fanahy masina niasa tao amin'i Jesoa ka nahatonga azy niteny hoe *“Ato amiko ny Fanahin' ny Tompo, nirahina hitory vaovao mahafaly aho, hanala izay mamatopatra rehetra, hanafaka alahelo sy hankahery izay torotoro fo”*. Isika koa dia tahaka izany eo anivon'izao tontolo izao, izany no maha Eglizy Olona Velona antsika mpanorina Eglizy Tranon'Andriamantira izay trano iombonana efa potika noho ny fahotantsika.

Isika izao feno ny Fanahy masina, ilay nampantenain'i Kristy ary izany no voalazantsika teo am-piandohana, efa mampitsinjo antsika sahady amin'ny fiainantsika aorian'ny Paka dia ilay Pantekôty Vaovao andrandraintsika hanorenantsika fiainam-baovao ao amin'Andriamanitra eo anivon'ny Eglizy kely fianakavian'Andriamanitra, eo anivon'ny Eglizy iraka, mba ho aim-baovao entanin'ny Paka ka hampianatra antsika ny làlan-kombana sy ny tena fiainana ary ny fahamarinana dia tsy iza fa I Kristy. Hampanjaka ny rariny sy ny hitsiny isika ka hikatsaka mandrakariva ny soa iombonana ka hahatonga antsika ho mpamafy fiadanana sy fandriampahalemana ka hampijoro ny tena marina hampiombona antsika.

Izany no antenaintsika amin'izao Sinaody izao. Entanin'ny Fanahy Masina isika amin'ireny dinika ataontsika ireny ka mahatonga antsika hahatakatra izay lalana mitondra antsika hifanasoa sy hifampitsimbina mikatsaka ny soa imbonana. Maharezà àry isika amin'ny dinika ataontsika. Meteza ho entanin'ny Fanahy.

Voalaza ao amin'ny vakiteny voalohany izany raha mitantara ny zava-misy tamin'izany fotoana izany ka manambara fa rehefa avelantsika hiasa tokoa ny Fanahy masina dia hiova ny fiainantsika, ireo olam-piainana sy sedram-piainana dia zary aim-baovao, hery vaovao manosika sy hanampy antsika hanatanteraka ny hafatr'i Kristy. Hivelona ny tenin'Andriamanitra isika ary ny vokatr'izany dia izay voalazan'i Jesoa ao amin'ny evanjely dia ny fiadanana. Tsy araky ny fandinihan'izao tontolo izao fa araky ny vokatry ny fihavaozana nentin'i Kristy, vokatry ny asan'ny Fanahy Masina ao amintsika ka hahatonga antsika hahita ny marina, hahafantatra izay marina izay ka hifankatia marina tokoa isika, hifanasoa, hitady izay soa iombonana, amin'izay ho mpamafy fiadanana sy fanantenana isika. Ambaran'ny vakiteny faharoa *“rehefa tanteraka izany rehetra izany dia nasehony ahy ny tanàna masina, dia i Jerosalema nidina avy any an-danitra, avy amin'Andriamanitra. Namirapiratra ny voninahitr'Andriamanitra izy ary voazavan'ny kintana sy ny vato sarobidy, dia ny vato jaspera izay azo itarafana toy ny kristaly”*. Jerosalema dia ilay tanànan'ny fiadanana sy masina satria misy an'Andriamanitra izany koa no irintsika amin'izao isika hamakivaky ny herinandro vaovao **ity** izao, hanjaka eo anivontsika tokoa anie i Kristy. Masina ny fiainantsika raha Andriamanitra eo anivon'ny fiainantsika, eo anivon'ny fianakaviansika Eglizy kely, eo anivon'ny fiaraha-monintsika, eo anivon'ny firenentsika ka amin'izay hiadam-pinaritra isika, izay ilay Jerosalema. Ambaran'i Md Joany amin'ny vakiteny faharoa *“naseho ahy ny tanana masina nidina avy any an-danitra”*.

Ry Jesoa Tompo ô, eto anivonay tokoa ianao na dia efa niakatra any an-danitra, miara-dàlana aminay ianao mba hahatonga anay ho Kristy mpiara-belona amin'olona. Ianao koa no nampanantena anay ilay Fanahinao masina mpanafaka alahelo, mpanavao, mpanazava hampahafantatra anay ny làlan-kombana. Raha mitandrana ny teninao tokoa izahay dia hahazo fiadanana ka ho afaka mizara izany eo amin'ny mpiara-belona aminay ka hahatonga anay ho Eglizy Olona Velona manorina Eglizy Tranoben'Andriamanitra, zary taranaka mpanorina. Na dia eo aza ireo zava-manahirana tsy maintsy atrehina dia matoky izahay fa ao aminay ny Fanahinao hanananay ilay fiadanana nampanantenainao ka hafafinay amin'ireo manodidina aminay, ilay fampanantenana omenao anay ka hankahery anay hijoro ho fahazavana eo anivon'ny mpiara-belona aminay. Masina Maria, Volana hanajana manokana izao, miaraha dia aminay tahaka ny nataonao tamin'ny Apostoly nitalaho ny Fanahy Masina. Mila Pantekoty Vaovao izao andro izao. Md Josefa, Ray Mpiaron'ny Eglizy mivavahà ho anay mba hanana fo vonona hohavaozin'ny Fanahy Masina ka hiroso lalindalina hatrany hivelona ny finoana tahaka anao na dia eo aza ny sedra maro lafy. Amen